

## L'ultin patriarcje: Denêl Delfin

Dôs peraulis di coment aes leturis che o vin fat, prin di dâ reson di cheste Messe di usgnot. O vin sielzût lis primis dôs leturis, une dal Vecjo Testament e une dal Gnûf, che a tocjin la Eucaristie, parcè che o intindin cun cheste celebrazion dâ une man propit al Congrès Eucaristic che a varessin di fâ a Udin.

La seconde leture e je stade sielte propit oportunementri parcè che tor l'undis di Març, in veretât ai 13 di Març dal 1762, al è muart chi a Udin l'ultin patriarcje di Aquilee e di dut il Friûl. E usgnot o vin intenzion di memoreâlu.

\*\*\*\*\*

A mi mi à semeât che par memoreâ l'ultin nestri patriarcje, il vanzeli miôr che o podevi sielzi al jere chel de resurezion di Lazar, parcè che al sarà permetût ancje a nô fâ un pocje di parabule. Crist al è bon di fâ tornâ a vivi ancje i muarts.

Ore ,in veretât il patriarcjât di Aquilee al è muart. Jo però o olsi preâ Diu che al vueli fâlu tornâ a vivi parcè che o vin bisugne ancje cumò dal patriarcje, come pai secui passâts.

Il patriarcjât di Aquilee al è stât disfât ai 6 di Lui dal 1751. I cantins a son clârs te storie. Stant che il confin politic fra la zone di Vignesie e la Austrie al taiave il Friûl in doi tocs, il probleme al jere chest: il patriarcje, vevial di jessi venezian o vevial di jessi austriac? Su chest cantin a son lâts indevant par cualchi secul, cui tirant di une bande, cui tirant di chê altre; a àn metût tal cjâf a pape Benedet XIV che la uniche soluzion e jere chê di disfâ il Patriarcjât e di plantâ lis dôs arcidiocesis di Udin e di Gurize, une pe zone austriache, chê altre pe zone venite.

Jo o crôt che si puedi ancje ameti che il Pape Benedet XIV lu vedi fat tal fonts de sô anime parcè che al pensave che no si podès dislidrisâ i malans che a jerin di ca o di là, corezi lis brutis abitudins, predicjâ ben il vanzeli, intune peraule rezi ben la diocesi di Aquilee cuntun confin tal mieç. Ma o crôt ancje che la politiche e vebi metude la sô code di mieç: di une bande Vignesie e veve il patriarcje, robât a Grau, e cussì no sopuartave tant vulintîr che al fos un altri patriarcje tal so teritori; di chê altre, la Austrie di Marie Taresie e cirive di vê chest onôr, e cirive di vê in cualchi maniere chel altri toc, di tignîsal dûr par se e dome par se, e di no permeti che int, che e podeve vignî di Vignesie, e ves alc di dî in glesie tai siei teritoris.

\* \* \*

Cheste e je stade la "reson"!

Lu àn propit disfât e la "Bole" e je tremende! Parcè che e bute jù par simpri il titul di patriarcje, il cjapitul di Aquilee, i dirits di diocesi e di metropolit. E je une robe che e semee propit une sentence, no di un om che vuê al è e doman nol è, ben savint che un altri tal so puest al pues fâ il contrari di ce che lui al à fat, ma una sentence dal judizi finâl di Diu.

Di in chê volte, il Friûl nol è plui stât une comunitât religjose unide.

O sin stâts spacâts a tocs, come che us disevi ai 29 di Zenâr, e usgnot o completi ce che o vevi di dî in chê sere. O sin stâts mandâts, dal pont di viste gleseastic, a fruçons. Baste pensâ che in di di vuê e esist cheste robe curiosissime: il titul di patriarcje di Aquilee lu à il patriarcje di Costantinopoli, il titul di arcivescul di Aquilee lu à il nunzi tal Madagascar, il titul di vescul di Zui in Cjargne, che e je una diocesi des plui vecjis tai limits dal patriarcjât, lu à l'ausiliâr di Imole. A fâ a pueste, no si podeve fâ tancj fruçons come che a àn fat.

\*\*\*\*\*

Ma una robe dal gjenar isal un probleme religjôs dal di di vuê? Lu crôt profondementri par cheste reson: Crist nol è vignût a dividi e a disfâ chest popul, al è vignût a puartâ la samente de sô peraule; fevelant come che al fevelave Lui, a meti il levan te paste dai

popui come che a jerin. Al è che culi Crist al à fat puartâ il levan de sô peraule, de sô dutrine e de sô glesie intune int che à vût une fisonomie uniche, tant che al è vignût fûr un patriarcjât che al è l'unic, in dut l'Occident, diferent di Rome.

O crôt che Crist nol sei vignût a puartâ il so levan par disfânus, ma par fânus diventâ siei, restant umanementri cemût che o sin.

La Glesie e à di rispietâ chestis robis; no pues no rispietâlis. Cjalait in muse Crist: Crist nol è un om cualuncue: no, al è un ebreu de tribù di Jude, de famee di David. Clâr e taront: Gjesù Crist nol è vignût a parâ jù in nissune maniere lis carateristichis dai popui.

Ore, parcè memoreâ l'ultin patriarcje? Clâr. Parcè che pastoralmentri, par fâ dal ben a cheste int, il ben religjôs plui profont, par fâ che la paste dai furlans si jevi cu la peraule di Crist e cu la Glesie di Crist, dutune in dî di vuê come par un passât di mil e tresinte agns, e covente la unitât di Glesie in dut il Friûl.

Al è il moment di dîlu, parcè che jo no sai se lu àn fat savint o cence savê, ma il titul dal Congrès Eucaristic al è "Eucaristie e comunitât locâl". Mi permetarês alore, cun estreme clarece e cun veretât, (la veretât ancje se e semee che e fasi mâl no fâs mai mâl) che o disi che culi al è tant di Eucaristie e pôc o nuie de comunitât locâl.

Un Congrès Eucaristic in dî di vuê, cuntun titul di chê fate, o crôt che al vedi il dovê di tornâ a dâ dongje i fruçons che a àn fat de nestre comunitât religjose; di pratindi che nus domandin almancul perdon di ce che al è sucedût te storie. E stant che "resons" come che a vevin in chê volte di gjenar politic no 'nd è plui, o crôt che e sarès la ocasion plui juste, plui naturâl, plui impuartante di rispietâ lis glesiis di ducj i popui, scomençant propit di chi, dulà che al è stât l'unic patriarcjât diferent di Rome. Si à di scomençâ cui fats a rispietâ usancis, mûts di pensâ e di fevelâ, mûts di vivi e di sinti il Vanzeli localmentri.

Lu dîs cun estreme scletece e o crôt che Diu, che mi sint, nol vebi nuie ce dîmi. E par chest, o memorein chest ultin patriarcje, che al è muart di scopecûr parcè che nus à volût tant ben. Il Pape dal 1747, par podê fâi gloti la pirule che i stave preparant, de distruzion dal Patriarcjât di Aquilee e, lu à fat gardenâl. Ma lui nol è stât par nuie content. Al à capît che e stave preparantsi pe Glesie dal Friûl une ete che nol è facil fâi la storie, ni soledut al è stât facil vivile parcè che masse dividûts, masse fruçons, cun direziions diferentis, che al è stât pôc ce cumbinâ di ben.

\*\*\*\*\*

Par cumò o prein che Diu nus scolti e al sei bon di fâ ce che nô, salacor, no sin bogns di fâ. O sin bogns dome, par cumò, di pensâlu e di desiderâlu, come che o vin dite te preiere de Messe.

Che il Signôr nus scolti: Lui che al à risussitât Lazar, al pues ancje risussitâ la nestre unitât di Glesie dai timps di cumò, che a mi, e o spero ancje a voaltris, al semee che e coventi une vore e che al dopri la ocasion dal Congrès Eucaristic par fâ una robe dal gjenar.

*Udin, 26-02-72 (Madone di Gracie)*